

En memoria da Giusep Beeli-Monn, Trun

Giusep Beeli-Monn ei naschius ils 29 da november 1931 a Trun. Ensemen cun ses treis fargliuns ha el gudi el ravugl dalla famiglia ina legreiva affonza. Gia duront il temps da scola ei la trumbetta stada siu instrument preferiu ed el ha schau resunar quella varga vegn onns ella musica da Trun. Paucs onns pli tard ha el aunc empriu da sunar la harmonica. Duront las liungas vacanzas da scola ha el sco bia buobs en nos vitgs giu da far caver ni pastur. Quels paucs raps ch' ei deva, eran a nos babs cun lur paupras finanzas bein vegni. Finida la scola ha el survegniu ina piazza en in pasternaria a Cuera. Cu 17 onns ha Giusep entschiet siu emprendissadi sco cusunz tier la cusunzaria Weber a Glion. Suentar quei emprendissadi sescolescha el vinavon, serenda per

in onn a Minca e retuorna sco caucusunz. Dapi 1959 tochen sia pensiun lavura Giusep sco cunscenzius um da professiun tier la fabrica da ponn a Trun, ch'era da lezzas uras lunsch entuorn enconuscenta. Sia incarica era il skizzar e designar uniformas.

1962 marida Giusep la Maria Barla Monn, feglia da Giusep Monn-Flepp da Sedrun. La luschenzia dalla famiglia ein lur quater affons. Las biaras spassegiadas, igl ir per bulius ed izuns cun els, ein reminiscenzas che restan a tuts en buna memoria. Buca meins gronda legria han ses biadis e biadias fatg ad el pli tard.

Giusep era in um dalla natira. Gia en ses giuvens onns ha el cattau siu hobi preferiu, che el ha tgirau, aschiditg che sia sanadad ha lubiu ei. Cun siu amitg Johan Steger ed aunc auters ha el sco



cavacristallas discuvretg bein enqual fuorn cun nundetg bialas cristallas e minerals. Ella pezza era el da casa. Il contuorn da Punteglias e dils Cavistrai era siu paradis. Puspei a casa presentava el cun luschezia ses scazis, raquintond bein enqual historia ed anecdotta sur da sias anfladas. Per 60 onns commember digl SAC ha el retschiert la medaglia d'honor.

Ils davos quater onns da sia veta ei Giuseppe staus en casa d'attempai, dus onns e miez a Sursaissa ed in onn e miez a Trun. A Trun en stanza cun l'egliada sin sia carezada casa paterna. Era sch'el ei pauc ni bia staus ligiuas vid il letg, ei il selamentar buca staus da casa tier el. Al personal eis el staus engrazievels per tut quei ch'ei vegniu fatg per el. Possi Giuseppe ruassar en pasch.

Gl'unviern 2024

Sep Alig

*Gie igl unviern ei cheu,
dapertut eis ei tut tgeu
eis el per auter preparaus
ni eis el forsa vilaus?*

*Igl ei bellezza il mument
quei ei per tuts stupent
l'aura ha adina sias lunas
e quellas ein buca adina bunas.*

*Nus sevein guder il bien sulegl
e quei dalla damaun marvegl
po per la neiv eis ei pauc d'engrau
igl ei gia tut terren enturoun clavau.*

*Nus savein guder ed esser cuntents
e tuttenina suflan lu ils vents
tgisà co e tgei ei sa aunc dar
cheu savein nus mo spitgar.*

